

四庫全書

集部

欽定四庫全書

清容居士集卷三十

元 袁桷 撰

墓誌銘 墓表 葬記

宣武將軍壽春副萬戶吳侯墓誌銘

往者壽春為宿亳要衝犬牙相承城郭樓櫓移易無常
所草舍殘缺狐兔出没道途間築覆土窖以避妻子短
兵迎接利不利不復計猶持農器治田壤惴惴求活歲

率如是世祖皇帝以天兵取江南捨兩淮為最後至元
十一年外渡江十二年平江東抵錢塘宋社告亡十三
年兩淮爭奉地圖以降無鏃刃之費天下大定而淮始
得為樂土矣當是時吳侯祐以壽春歸職方其子安民
字惠卿侍父承顏行率部伍招輯潰卒控曹橋下獨松
渡越江畧定會稽台溫三城南踰閩嶺拔莆田擒將李
雄生俘其守臣而以功歸其父二大帥曰吳氏子宜第
其戰多別有以賞勵乃署千夫長十四年父卒始襲爵

佩金符為管軍總管鎮揚州十八年大治兵伐日本拜
疏請行授宣武將軍征東副萬戶領淮東西兵以先舟
師抵其國八月颶風大作器械軍士沈溺物故破舟
亂流以經海島高麗日本二國常不相能遇高麗邏人
問所以載與還而先帝亦厭兵罷征矣二十年建黃華
反奉命往討之至政和縣獲賊將度九峰嶺接戰益急
得其偽署圖籍虜驍將以歸十有二月昧爽進軍平溪
華盡死力拒砦赤巖山盡俘其器甲族屬黃華始平迴

鎮揚州二十一年省治杭州從與其年鎮湖州路南
潯明年調嘉興路海鹽未幾復還南潯又還鎮壽春二
十四年詔領軍討交趾至黃州罷兵二十六年鍾世明
叛江西吳太仲叛興國縣搏竒踪虛率以底寧上功司
勲輒卑退不欲言三十年移鎮和州大德四年七月某
日即世年五十有七娶楊氏先卒子男若干人長繼武
襲其爵葬于宣武侯之墓左曾祖某祖某妣某氏予嘗
聞古名將垂老呐呐若不能言祕畫勇畧壯歲所施無

留蘊閱成敗得失已盡醇酒鐘鼓夫豈託焉以自完者
與烏江馬君某言吳侯知儒書後悟浮屠氏禪學充然
若有得其女弟亦能為禪人偈語是皆世所鮮有者銘

曰

維昔淮甸勁雄莫侔一夫當百鋌戈怒投裹彼乾餱聿
嚴盛秋養安懷愍苞桑靡謀天錫大帝神武興邦捨其
喉襟投鞭浮江俘駑擒驍百城春撞視彼彈丸後夫卒
降桓桓吳侯效命奉職以其素能昭代著績褰裳先登

颺掠電激或乘其蹙或躡其跡瞻彼霍山雲流無蹤昔
困于兵今黍芄芄繫帝之功維民之逢侯之幽宮松栢
茂直告而孫子靡懈靡忒法其退謙恬靜以默我思于
淮作銘示刻

同知樂平州事許世茂墓誌銘

端平三年蜀破衣冠大姓順流下東南至江陵十不存
一二皆舟觸巖嶸瞬息以死淳祐三年蜀益蹙避兵來
南其物故與端平無異宋主憫其流離悉擢列在位大

者輔政機備獻納外為閭臣郡將經術史學四方取以
為宗則宋既亡故國世臣益困辱不自振淪胥泥塗非
獨蜀士然也大德七年楠備史屬選與虞忠肅公孫集
交許君松以湖廣掾上計京師詢其官簿則顯謨閣學
士給事中少保諱奕之曾孫中奉大夫知紹熙府謚介
節諱彪祖之孫奉議郎通判涪州諱長源之子君字世
茂懿範世則珠貫而櫛比語西蜀事歷歷在指掌清言
雅儀筆札擅簡古卑讓恥與後進較酒至醉愈恭不復

作世俗語遂締與之交至大元年授潭州權茶副使再見之貌益溫論事盡繩墨智圓氣完欲以政理自表見故其為茶官也不務苛刻而課有贏羨仁宗皇帝立科舉以君考鄉試自喜曰吾嘗貢于鄉黜浮培實宜以稱明詔是歲君所貢士入南省號為得人延祐五年授徽州路婺源州判官復與語輒愀然曰吾家繇開慶初辭簡池寓南康墳墓井邑生別踰五十年貧不能忘祿齷齪州縣弗得以文墨顯吾何為哉其治婺源益自振剔

絕蔓探疑明以近民而盜跡不敢入境至治二年見其神益清貌益癯舉酒屢酌却雋永猶喜議當世事桷與翰林直學士曹君元用子貞共署薦為湖廣提舉儒學思以佚其老集賢直學士鄧君文原善之亦曰是舉誠不忝吾為江東分部使者嘗舉其政事文學矣十一月授承直郎饒州路同知樂平州事歲終得上氣疾正月甲午終于邸舍年七十有二曾祖妣某氏祖妣某氏妣某氏娶趙氏再娶陳氏子男若干人女若干人孫男若

千人始君居南康閉門授徒以奉母右丞燕公公楠開
營田司知其賢取以為佐後遷行大司農益任之掾湖
廣省六七年能以儒術輔法令事明理融無底滯固陋
一時吏師尊禮之君始生踰百日晝夜啼不止有僧祝
其頂曰汝為許氏子啼何為耶啼乃止未幾涪州下世
年八歲隨舅氏茶馬趙君寓江陵里有灾能取涪州神
主奉以逃稍長益自奮勵諸老咸器偉故晚歲宦業雖
不大顯而行事有足稱者其喪歸以某月某日葬于某

原子昨踵門以廣信劉君光事狀泣曰願請銘楠泣相
向不復辭嘉定更元韓侂胄誅解偽學禁先少師正獻
公曾大父樞密越公相繼入著作庭給事中少保許公
魏科首班著善類肅穆天下傾動未幾少保論外戚不
合去今幾百二十年閱昔時題名求其嗣續率皆漸盡
銷鑠而楠與世茂俱為曾孫相顧自保灰編墜簡證世
德之舊於世茂實有望今死矣雖欲勿哀其可乎銘曰
蜀絲秦開千載底寧英光蜚聲山川耀靈漢魏啓伐

不假以兵唐宋踵規開門畫迎錦楹繡牆夸浮日矜帝
鑒地圖百神震驚氈車轟轟金戈晶熒自西徂東舳艫
貫繩或沈于淵或疫以乘蹇蹇許公疑丞弗登是生介
節嬰彼孤城恂恂涪州弱息慎承流離拮据守其書籟
儒以飭身政以裕名匪急於祿抗宗希成凡我士族樂
范是懲東南之區凜其春冰我思許君是用述銘

任隱君墓誌銘

鄞甬東橫溪多郡宗故家楠之七世祖祥符丞而下娶

婦皆楊氏少保夫人曰申國太保曰越國魯國太師曰
齊國幾三百年矣楊表為中外表歲時往還無虛日而
甬東任氏與楊姻婭亦十餘傳一日任氏子元善介予
表兄楊仁之以其先君子之狀求銘復錄其十九世祖
唐建州司馬遠之墓記以示其記曰建州生佶檢校尚
書工部員外郎兼侍御史是生崇試循州司馬循州生
貞幹元和十三年補集賢殿供奉承旨後為越州都督
府功曹叅軍以終集賢生行規大中時以明經薦于鄉

舉上第為蘇州司兵叅軍吾里士族莫先於樓表楊蔣
作郡志者於任有缺仕莫榮於集賢承旨承旨布衣為
者也職撰述校理在元和時任不輕畀司兵以明經登
唐上第尤偉著志亦不紀考孫吳有任光任奕皆鄭句
章人今其地為鄞縣則建州蓋二賢之裔而先賢皆遺
軼比予補郡乘亦缺然有愧矣嘗考大中以後鄞數為
盜侵掠城燬蕩遷徙錢氏以宗親專節鎮租稅刮剝民
不堪奉昔時故族躡藉銷鏹於任氏槩可見至宋受版

圖興文儒鄞士在汴始盛渡江以南雲滄川湧幾二百年而不幸數十年詩書廢墜望塵執隸欲為任氏十九世之傳不可得噫可勝嘆哉可勝道哉任君名天祺字君瑞曾祖汝諒祖用康父逢龍其居鄉善保衡徵調數起先事以備縣胥不能高下友其弟天麟弟病酒死曰吾不可使弟無後殯其喪俟我死必俱葬也大德七年六月某日卒年五十有八未幾婦顧氏亦卒以其遺言大德十一年十二月丁酉奉柩與弟及婦俱葬于吳公

山之祖瑩妻屠氏四子元善可善承弟後達善兼善孫
男四立道弘道鳴道原道孫女三立道楊氏壻也銘曰
世胄日顛任譜完堂堂文藝志錄傳昔通今晦理則然
鄉井急誼手可捐金我東聳下泓泉蹇極遇順盈百川
我銘考官以昭先歷十九世緒益延焯哉任恤德靡愆
率而雲仍亘千年

史景賢墓誌銘

君諱韋卿字景賢鄞史氏故國世臣太師丞相保寧軍

節度使越忠定王諱浩為曾祖妣貝氏魏越國夫人太師中書令保寧昭信軍節度使衛忠獻王諱彌遠為祖妣潘氏齊魯國夫人觀文殿學士正奉大夫奉化郡公諱宇之為考妣趙氏高平郡主君幼成合矩度進退持奉侍立占對識者知真王孫筆墨書史楚楚自將皆有法郡公目送深念之稍長鉛采自陶寫蒼松斷崖昂然有遺世意宮商敷宣綵鸞詠而鳳幽鳴也退靜韜匿冥會於千載之上察其念良是矣郡公職二品君當以京

官入仕生晚祿弗及至治三年秋八月得上氣疾却藥賦詩出別於宗親楠時官京師呼楠子瓘立牀下曰為吾語而翁求銘以昭吾志焉越翌日辛酉果卒嗚呼年甫四十有八章綬積襲隱顯有定數至於年亦不得永是可哀也已維忠定王楠外高祖幼習外家獻文世德相業焯在宋史不敢論獨叙三世壽考以增君之悲維忠定以三公居東湖三十年陪祠慶壽秀骨山立多士秉笏交語曰史太師真壽相年八十有九即世忠獻獨

相二宗二十有七年總核庶政燭照藪納罔有缺年七十以終郡公恂退若癯儒龐眉素毫冰玉照焜鄉黨年七十有九迺終壽種彰灼若是君才不得一見施設年又不能以紹傳是大可哀也已子一性孫女二將以某年某月葬鄞縣陽堂鄉金輿之原銘曰

寥寥東陵瓜圓熟沈冥里閭企高躅達人知命化不惡手持參差入雲谷周公魯公儼初服奉著以占剝斯復學詩習禮在嗣續我銘孔悲辭匪瀆佳城鬱蒼覘宰木

袁州知事孔君墓誌銘

大德初元孔君昭孫明遠甫為慶元儒學正于時禮部尚書王先生應麟師表後進門無雜賓明遠以通家子執疑證訛稱每連席請益時則有教授某恣睢自負語侵先生迺憤然曰吾不能與之共處疏其謬誕十數事鳴憲府人益竒其抗直有先中丞遺風是後為蘄陽教授蘄陽舊為邊障地君能化其俗使稍就學久之丕變為儒士皇慶元年授慈溪縣主簿郡人咸曰是斥故

教授者飭躬以廉民莫敢病未幾江浙省取為掾會歲歉
計富人籍田出粟以賑吏不能舞文粟悉入市其直輒減
宰輔竒之延祐某年授從仕郎東州知事秩滿泰定元
年以疾卒時年六十有二君實孔子五十二世孫中丞
為大宗傳四十有七世中奉公傳與其從子玠南徙三
衢賜廟譜諱章灼而君之考諱某咸淳間為名太守後
僉書樞密院事職進資政殿大學士而大父某亦贈太
子少師謚文介曾大父諱某贈某官妣某氏某氏某氏

俱贈郡夫人噫士常患為世家紹宗趾嫩懼難以繼仕
顯矣德不稱無取也言足以斥姦發揚剛毅是則於孔
君見之仕雖不大振於孔君何憾焉予嘗與君繇義烏
同邸宿至婺學旬日危坐論古今各欲以名節相勉而
懷竒抱介予輒讓不敢今歸老田里期為全人思一見
明遠不可得至是淇來請銘安得勿哭也已娶王氏前
進士集之女男六淇淮繼兄後海蚤世消繼弟後建德
儒學正瀛慶元昌國州儒學正許早天女二闕
陰王

壩富春張順可某年某月葬葉水浮河原銘曰

金剛而冰清行之成也白兮不緇德之貞也憤世嫉阿
全粹精也謝彼戚施實蜻蛉也銘以揭之歸藏永寧也

僉事范君墓誌銘

大德六年范君子誠為平江路經歷于時摘將之京師道
吳其郡大夫疑忌事多不決范君抱牘堂上定可否大
夫領領不復有異議人皆曰是真贊畫才嗣後為掾中
書仁宗皇帝在東宮興崇禮文廣廟祭凡視執政者率

增贊書桶時日具紙墨君排剔研討使各中繩式莫有
訾議嗣爾厭繁劇告外補湖州推官又為黃巖州州與
鄞相犬牙治跡賢否嘗耳接巷議州民來鄞必曰吾州
黃氏子號豪民范侯能挫抑之帖首受罪後予直集賢
黃巖之儒生暨商于城垆者咸告曰黃生易黃冠訴范
侯以不直遂議于大學士郭公訖不受其說精神籠絡
貫穿于儒術法律將大展其用而其子景文踵門泣以
告曰先君之不祿在泰定二年閏月某日得年七十道

遠不克歸，莫以是歲二月某日與大父奉議君俱葬于平江路長洲縣武丘鄉白蓮橋之址。原知先君莫如子，敢以銘請。謹按君諱忠，其先京兆藍田人，後籍真定。今三世矣。其為仕，首受史丞相之孫耀辟為浙東宣尉府掾，改受蘭溪主簿，再辟江浙行省掾，迺授平江路經歷。又授揚州路經歷，不赴。改辟都省掾，授湖州路推官。以選能為海道府千戶，分治四明。知台州黃巖州。英宗皇帝詔風憲舉守令，再知徽州婺源，改同知福建轉運鹽

司事泰定元年擢僉江南浙西道肅政廉訪司事其簿
蘭溪嘗攝尉事捕造偽楮當受賞君謝不取在湖州有
訟弟死非命且疑弟婦受賂焚其尸君錄囚考弟實以
鬪死婦始得脫湖多淫祠毀三百六十以治官舍分漕
四明首拓廳事嚴竦治具新天妃宮以肅祠使其治黃
巖黃氏事最著正彛倫絕攘奪尸祝口誦宣著于郡乘
婺源俗尚競渡易其舟為浮梁民不病涉在閩中鹽足
於民而私貿者悉絕考其所居官興建鋤擊為已任絕

功利守名實為君素志迄不展大用壽與祿不失其願
亦可無憾矣嘗註禮殿祭器書二十卷歸于鄉學集賢
王公仲常為文以美篤于慈孝卹宗錄孤故贈禮部郎
中白公某壯歲深奇之妻以女君感知已凡所為樂府
梓刻以傳曾祖昂霄金大安元年進士官正議大夫同
知靜難軍節度使兼邠州觀察使祖元泰元授從仕郎
同知解州事父天祐汀州路經歷贈奉議大夫真定路
趙州知州驍騎尉元氏縣子景文由臨安主簿辟江浙行

省掾敏修善吏事其進將未艾孫二公琇公琰孫女五
乃為銘曰

吏詬于儒以儒為拘儒以病吏其刻莫渝據會統宗孰
承其傳溫溫范侯趾嫩紹先化其奇觚不急以干削豪
翦強欲援以手謂不大逢亦既祿壽世方尚名我獨倚
之彼喜以功縮武避之武丘之原松柏峙植魂無不之
子孫承式

鄭照磨墓誌銘

鄭威敏公驤以靖康虜難死同州紹興錄孤褒忠賜廟
愍節至于其孫建德登進士第延賞守祠世嗣不絕五
世孫諱元貞實奉祠事生孫曰端是生汝賢為江西安
撫司準遣生檜為都酒庫官君之父也君諱文瑞字子
祥生而骨相殊特府君深竒之稍長從鄉先生課程文
有能聲科舉既廢居里閭以孝謹稱至元間下令舉儒
吏實預首選試郡功曹移典玉山郡侯復取自近省授
監平江路倉轉海道萬戶案牘官再為海鹽州案牘轉

行省鈔庫副使平江庾氏歲入浩夥不得脫君獨以治
辨稱海鹽多豪民殺人率遣奴償死君能直之行省積
弊楮三年不毀君上言申其數而歲除之後取以為法
泰定元年勅授將仕郎浙東道宣慰司照磨兼承發架
閣予見君于京師言議縝密剴割苛冗中綦節暨官帥
司下帷沈思吏跡不入戶勾稽研覈充然益有餘地古
之善居官者必自持家始自衣冠丘墟不復給足荷戈
負耒何可勝道念昔信實要衝君獨善理其身掇拾化

治任能竭力相其天時權其羸竒卒昌於官以發其素
蘊是殆於君見之抑又聞之流光演休首於死節宋社
云亡忠義之錄一二僅見則威敏之澤雖十世未艾君
續其承猗與盛哉其卒在泰定三年九月某日年六十
有三某月某日葬某縣某鄉子男四謙亨復亨鼎亨泰
亨女三嫁黃中正孫良玘葉原道皆仕族孫男七孫女
七娶姚氏曾祖妣蘧氏祖妣劉氏妣謝氏謙亨奉柩將
歸里踵門泣以告曰先生故大門知官譜唯詳而吾里

獲銘者數家矧先子世系若是敢以請銘曰

志專豐崇足昌其躬家傳于忠蹇事于公美玉襲之良馬
執之泄不辱以紹以續作之怍怍承之競競而子而
孫視我斯銘

文清薛處士墓誌銘

孔子叙逸民謂其求志達道超然於塵垢之外心若槁
木形若蟬蛻動莫有跡行莫可名其混世也物莫與俱
冥神內觀返真潛虛若是者其近之矣故昔之善晦匿

者草衣菲食不導引以壽養其天年恣縱泉石歷探遠
挹興至而若遺擇幽紮以養其雅操求於世吾不得而
見之矣今得一人焉曰處士薛君勉薛君信州貴溪故
儒家自其曾大父子徹以儒科縣南丹大父琢父士亨
繼業進士君益以儒自勵居鄉黨教授名不斲彰沖然
有容守約自裕游湖湘極交廣返築室于宜陽納幽據
勝為堂曰寶善以示子孫泰定三年四月某日卒年六
十有八族黨姻戚咸會哭曰先生儒以紹傳茲其為文

也宜矣固窮而無求貽書以遺後其得不謂之清乎遂私謚之曰文清子二玄義玄儀玄義與余為方外交在崇真宮數評議吾徒所當為事詞章清峭翰墨簡潔每視之嘗以為不可及君既死求銘於余實不敢辭在易蠱之上九不事王侯高尚其志而初爻則曰有子考無咎嗟夫離世絕俗念不存於家非子承意曷克臻濟是肥遯者猶相須以成也妣王氏配孔氏孫男二女一以某月某日葬銘曰

冥飛維鴻莫窮去還飄搖長裾游於海寰沈匿不羈謝
彼世艱貞簡峻清玉雪者顏支離侶困爰養其遜先賢
高風承耳接論葆真藏名永裕嘉問振振有子益昌者
名三光盪摩服其粹精有大之松清風泠泠非培曷成
非繼孰承

海鹽州儒學教授索府君墓表

維索氏四明大族繇處州太守諱轂試開封府第一登
嘉祐四年進士第佐蘇文忠守杭文忠為同年生後贈

光祿大夫生倉部郎中諱灼得罪政和以歸生贈朝奉
諱堦朝奉生通議大夫諱文通議生龍圖閣學士贈少
師諱燮嘗以禮部侍郎專史事謚正獻天下稱為絜齋
先生楠七世祖諱毅試開封以中書守當官遷祥符縣
丞生曾孫為少傅同知樞密院事諱韶贈太師越國公
受學正獻公於宗譜為族子相踵登淳熙進士第同入
秘書省為史官先後為侍從搢紳榮之正獻生子四人
俱至名卿尚書東宮官而第三子最清顯嘉定七年進

士第一再任國子祭酒仕至兵部尚書給事中實錄史
院修撰諱甫贈少傅謚正肅天下稱為蒙齋先生正肅
次子諱後通判潭州是生君諱裒字德平以安定長授
海鹽州儒學教授未拜延祐七年六月二十日卒年六
十有一嗚呼甲族鼎貴莫盛吾里薨棟接耀郡守丞監
官議婚對未肯齒擬華腴爭高姿庾悅澤可愛念遇大
變故困辱不自完業無依歸質質以死者多矣方至元
十五六年間故家猶亡恙海鹽時年二十桶年十四五

移相議曰宦族久當圯宜斬為傳遠計未幾正獻宅火
留城南遂各盡晝夜濬源鈞思探索幽隱以黜陳辭為
已任考閩蜀東浙永嘉湖南江西之儒先合其異同不
在於貴耳雜書襲訛輯言行者尊之吾與子所當辨更
二十年各宦游四方君以憂窘困躓酒酣語豪卒不少
貶折詩筆益溫雅簡絜察其學猶以昔所言自任桷繇
集賢罷歸往拜馬病且瘠不能起忽手書曰夜夢游南
嶽署已判官遂釋之曰南正火也火為離為文明宜司

以瑞太平今天子興文祿弗及其在乎子孫未旬日下
世夫子作春秋譏世御史非世官不能兩家子孫凡五
為史官獨君不及用誠可憾曾祖妣邊氏秦國夫人祖
妣趙氏衛國夫人妣趙氏封孺人子四曰霆曰杲曰銳曰
齋孫一人有文集若干卷葬在正肅塋十步適迺表于
墓曰楠備史屬號最久見秉筆者罔再傳獨東平王公
其子文且賢纂修有能名嗚呼吾宗免矣夫君不得預
為可吁厥子若孫永紹圖至治二年歲次壬戌族姪具

官桶表

真定安敬仲墓表

嗚呼金蹠宋踰南兩帝並立廢道德性命之說以辯博
長雄為詞章發揚稱述率皆誕漫叢雜理偏而氣豪南
北崇尚幾何所分別當是時伊洛之學傳南劍至乾道
淳熙士知尊其說闡明之朱文公統宗據會纖鉅畢備
正學始崇又未幾偽學造謗成諱其說以售仕于時金
將亡各流離自保烏覩所謂經說哉有明其說者獨江

漢趙氏私相筆錄尊聞傳信稍自異流俗皇元平江南
其書捆載以來保定劉先生因篤志獨行取文公書會
粹而甄別之其文精而深其識專以正蓋隆平之興使
夫道德同而風俗一承熄續絕不在於目接耳受而有
嗣也劉既死得其傳者曰安君馬君諱熙字敬仲其學
汪洋靜邃謂文以載道辭不勝不足以言理故其言脩
以立於詩章幽而不傷慕貞絜之實將以自任其道者
也道散於異端九流證拾於墜簡傳者益遠而書幸具

在不知而作者則索於句讀之末旨意斷絕踵謬而莫
悟君設對問以辨後作者悔而焚其書左氏浮誕不合
經者悉去之續皇極經世書絲元豐至至大三年考家
禮為祠堂以奉四世邑人化之教人也持敬為本解經
必毫縷以析果知之必驗其所行弟子相從者常百餘
人出入閭巷佩矩帶規知其為君之弟子其於劉先生
也未嘗一見之蓋篤信其書默求以通焉者也劉亦知
君足以傳道卒不得見焉君深悲之而於學有侶君無

憾矣君之先太原離石人五世祖玠仕於金曾祖昇不
仕祖滔以經童登第金將亡徙真定因居焉戊戌歲詞
賦入等占儒籍考松江東宣慰司照磨妣劉氏君少敏
悟諸父咸器之素多疾嘗避隱封龍山然卒不得年至
大四年五月某日卒年四十有二娶張氏焦氏子二暨
垣女一嫁保定等路鷹坊總管王沖是歲葬藁城縣安
仁鄉先塋之側其卒也翰林學士王公思廉以書唁其
父曰自敬仲死詎安氏不幸士林不幸矣有遺文若干

卷既葬之十三年門人蘇天爵述其事狀踵門曰默齋先生天爵從學實有年先生之德之行願表于墓原使有考楠作而言曰真文忠公德秀與朱文公同里生不及事焉文公之學真實紹之侑食于廟于祠無異辭集賢劉公生愈後闡揚合一劉公功與真公並安君不得見劉公而道實有傳盛矣哉春陵之學四方為有準矣某年某月某日具官袁楠表

史猷父葬記

代其子作

大德丙午九月朔我先君子壽春推官卒于寢年七十
有三越十月丙午葬其地邇高祖越忠定王墓次百步
許先夫人郭氏卒葬十五年迺合窆焉嗚呼先君子諱
徽孫字猷父少孤祖母嚴氏躬教督具諷先訓感悟于
時史氏極貴盛壽春癯然整修奮棄子弟玩習搜紹淵
懿族祖文靖公見之曰兒當以文名吾門稍長試吏為
諸暨主簿從政精覈邑長缺使者俾治幾一歲入辟淮
東治田事調揚州司理叅軍帥大器重悉以事付甫授

壽春帥益取自佐循承直郎而先君子不復仕三十有
三年矣有詩文若干卷晚讀陶靖節詩語近意遠視世
德脗合深自慕擬平居無愠忤色筆墨清藝觴至輒就
做邵子觀物為詩數十篇久更困約益以理自得清日
危坐道舊事緩語不絕口鄉黨賴焉嗚呼公亘等五男
子為從伯父從叔父後者曰公玉公暮次公晝公旦女
三已嫁仕族浙西提點刑獄贈少師諱彌正為曾祖紹
興監酒贈朝奉大夫諱實之為祖朝請大夫通判處州

諱顯卿為父將葬謹書納諸壙

張府君墓田記

平章留守亞安公介其掾韓叔亨致命於袁桷曰吾外
大父張府君世燕大姓貞祐來兵革相尋獨府君逃難
脫死每言避兵本末輒吁歎涕泗且曰吾譜謀亡缺使
果得仕吾安能為祖父榮顯耶繇是益治生自裕強之
仕弗願也至元十五年三月某日卒年六十有七外大
母劉氏次黃氏俱無子一女劉出也嫁我先公中奉大

夫湖南宣慰使後以卹典贈金紫光祿大夫大司徒梁國公而吾母亦得封為梁國太夫人府君之塋在大興路大興縣宜泉里歲時率外孫奠薦于塋下封植崇謹顧瞻咨嗟推其所自出其接于見聞者誠莫有怠也更數十年則曰禮有隆殺焉推服盡之義至於異姓則必曰先王制禮不可過也夫禮繇情生使張氏有後焉誠不敢越吾懼其塋域之蕪沒詔于曾玄將有以謹諸為我記之楠聞諸春秋會盟稱辭甥舅之國雖數十世猶

徼福於先君敦叙之義蓋可考也掩骼埋胔先王之令
典留守公之用心合於禮者之為也凱風寒泉藹然見
於悽愴情之至也然則凡為子孫者寧不守其家訓也
哉府君諱祥字瑞之壻梁公諱某外孫長即榮祿大夫
平章政事大都留守領少府監行工部事佩金虎符武
衛親軍都指揮使兼大都屯田事次某承務郎太府監
左藏庫使次某奉議大夫太僕寺丞外曾孫凡若干人
延祐四年九月某日具官楠記

田氏先塋誌

太僕田茂實君秀與補交京師相好也大德乙巳三月某日其先君子諱某年六十有五卒于河南君秀墨色蓬首哀不絕道兼晝夜行歸治其喪將窆于大塋卜以不吉告越二年始得吉于邛山之白李莊迺徙武畧君與夫人齊氏合葬以諱某君祔至大戊申君秀奉家譜言曰嗚呼先君子德豐而養薄孤之罪也田氏世居豐州有試金武舉科為環州司候者諱青金徙汴拜武略

將軍總戎千夫屯鄧州鄧歸有元改為襄樊屯田官豐
州墓夷徙始占籍于洛陽武畧吾大父也先君子嘗言
金將亡城郭蟻潰四出馬塵南驅躡藉爭死枯骼野燐
千里一色豐州為路衝荒墟敗礫白日無人行聲自吾
少年聞祖父言每震掉不自已今汝生盛明時重和累
休振纓清朝吾老於斯土藝于田漁于河涵煦濡濟食
安閱華沒齒誠樂也仕何慕焉茂實泣受其言而書之
敢以為邛山之瑩誌請楠曰噫夫邛山古之幽宅也穹

隆衰廣可以數度自秦漢而降錮其封崇極于夸貴俠
侈之士不知其幾後今變更高者為雲烟下者為水泉
而慎終送死日相尋於此山愈完而愈新者何也夫貴
以日計德以世計德足而貴不至者命也恃貴而忘德
貴將恥之今君秀官于朝將貴矣念先君子之言警其
宴安彌以自勵吾知田氏之墓滄然而豐茸必戒必護
衍其子孫益守孝謹雖千百年無變而始田氏之譜者
由武畧愈遠而愈可考者由太僕其尚勉之哉母夫人

高氏慈儉有家則君秀今為奉直大夫太僕院判弟二
德峻世英葬以某月某日袁楠誌

高夫人葬記

代作

嗚呼我先考至元甲申歲七月十有三日不祿昉時年
二十有一平居嘗言吾宗世居遼陽始祖當金時以征
遼功封太師有子十人皆拜節度使金亡太師子悉散軼
獨曾祖奇嵐州節度紹其宗是生大父諱植為洛州防禦
使妣大氏夫人洛州生近侍局副使諱世榮副使卒吾

時年八歲妣王氏夫人寓殯于陝因家焉夫人鞠撫之
迄見其成人初娶郭氏前元帥左監軍巨濟之女後來
大名經歷高用之無子察吾氣宇非凡近遂以汝母歸
于我因定居大名而自洛州而下藁殯于陝者皆葬于
元城縣之令公鄉焉先考諱昂字冲霄繇轉運幕職拜
朝城武陟縣尉能以慈惠撫其民盜不敢犯後謝病退
居樹德自秘重享年五十有九以終昉初掾集賢由院
上中書自中書累遷為左司郎中出為潭州路總管太

夫人視聽明徹總覈靡密昉盡服王事一不使亂其志
意未幾入為中政院同知拜中書省參知政事尚書省
立後除江浙省參知政事至大四年詔官二品得贈二
代繇是副使得追贈嘉議大夫大名路總管兼府尹上
輕車都尉王夫人追封渤海郡夫人先考贈中奉大夫
參知政事護軍渤海郡公夫人封渤海郡太夫人皇慶
癸丑昉陞資善大夫為江浙行中書省左丞太夫人年
益高屢疏終養延祐元年春復召為中書省參知政事

奉夫人將北歸使者屢趣就道又未幾改拜集賢學士
商議中書省事迺不敢辭遂侍夫人來京師是歲十月
十日以疾終于正寢享年七十有九嗚呼昉不孝先公
亡恙時不能以祿為一日之養幸得奉先夫人以自慰
垂三十年不自殞滅禍罹慈親攀號訴慕實無所容罪
將以是年十有一月某日葬于先塋日薄未得謁銘于
當代謹志其梗槩納諸壙男一昉女五人長適梁從晦
大名等處管民提舉次適李允中萬盈屯丞二人蚤卒

次適李好義承務郎齊河縣尹孫男三人筠孫壽孫和
尚孫女一人孤子昉泣血謹誌

趙令人葬記

代作

嗚呼宰孫大父為郎時先子樂清尹始試吏部靜秀專
恪鄞史氏號相家刑部再世國子生執禮秉度不以官
簿矜許先夫人係永陽王族屬崇近莫敢議昏對永陽
尊刑部愛樂清遂以歸乃受封令人而始嬪焉夫人姓
趙氏諱孟柔曾祖師意追爵於吳謚宣獻祖希邈掌宗

正食于會稽夫人沖默謹視聽儀範不出屏閣相先子以和撫子若女無二意距先子葬始一紀夫人以歿歿時年五十有四嗚呼養不能盡哀未知稱乃大德丙午谷封于樂清之兆而先夫人之亡適終喪矣痛徹于天彙事徵德將不懈有侯永陽諱與柔夫人為長女刑部諱能之夫人為冢婦先子諱普卿宰孫為孤子女一嫁趙孟貫是歲十月甲辰葬謹濡血為之記

清容居士集卷三十

欽定四庫全書

集部

清容居士集卷三十三

詳校官庶吉士臣張溥

侍讀臣孫球覆勘

總校官降調編修_臣倉聖脉

校對官中書_臣宋枋遠

謄錄監生_臣

鄧洪繼

欽定四庫全書

清容居士集卷三十一

元 袁桷 撰

墓誌銘 塔銘附

周夫人墓誌銘

夫人諱天福朝議大夫知瑞州周公諱應合之女朝議大夫直寶章閣廣東經畧安撫知廣州冷公諱應激之婦今湘陰戶名頤孫之配世為龍興武寧人瑞州以學

行表後進論議惜許可湘陰拔童子科整敏善自晦亟
愛重之故俾夫人以歸兩家為儒宗婦壻各得所擇衆
咸曰在是夫人幼靜慧受女史工正書二弟始就學日
諷誦感發相勵事尊順謹嫺德儷義能使外有不知絮
豆邊洽昭穆靡密斟度恩意各盡夫宗宜焉二子曰有
泰有益保抱具訓輒置筆札毋誑戲稍長約繩墨躬詰
難嘗言吾誘弟以婉督汝以嚴皆一轍也善宜亟稱過
不可得聞書種寧有斷乎年四十有九以卒是歲大德

癸卯葬仁義鄉下畬里女六長許嫁周志行孫男三女
二仲弟分宜丞天鳳來京師楫與之游議門戶興植婦
道久賴數稱夫人之賢過時而彌哀於是有泰實來致
湘陰之命銘曰

有崇義閭維周之敷展世秉文耳受口濡執彼閭儀來
彝來祗宗承其和家安其慈誦聲在戶嘉醕在廡叶于
夫君婉德以輔雙桐高岡附萼煌煌耀紫舒英穀旦用
光冽彼寒泉聿環墓田昭銘新宮實曼厥延

方夫人墓誌銘

湖廣儒學副提舉上饒劉君安德恭甫之夫人方氏大德庚子五月己未卒卜祔先墓不吉迺假葬于舍東越八年相中堂山兆以吉告於是其子光以事狀來京師謁陳郡袁禎銘夫人世居饒之德輿幼特靜好其父隱君常抱膝上祝曰吾家世儒林當為汝慎擇婚對方是時上饒劉君某以太學名輩待次寧國教授歸授徒山中饒信地接武習進士業者率相戒師劉君始出鄉隱

君慨曰捨劉氏子奚適即德恭甫也未幾寧國死德恭甫刻意振擢不以貧窶自憚隱君念夫人憫德恭不自置察夫人意色無吝悌卒俾以歸德恭甫壯歲力問學預計偕生理靡密一不問夫人銖黍化治手廟而身理之者寒暑曲備方丙子兵變時德恭甫傾家貲以完護為急夫人力贊之事定勉夫以仕且言曰盍亦少慰吾父意始伯姊嫁同里蔡氏蔡姊家侈盛脫簪珥以服亟搖手弗受自是終老無異飾生男子曰升老幼卒德恭

甫晚得光時夫人躬訓育抱咄慈嚴酌宜迄見光克紹其父業焉始光游京師與余交相久話言母儀悲泣不已余特以為母子至情不足異夫賢其嬖子孝其母閭里知事者率能是及觀夫人之行與光終身之哀見焉若將弗及則帷閤衽席色笑敦厚制事以理夫豈勉而然哉噫是宜銘夫人諱柔則曾祖瑋祖應奎隱君諱逢吉卒時年六十有三子光瓊州教授今為中書屬從事孫男二至大二年將治葬德恭甫亦即世於是以其月

某日祔銘曰

詩始房中維教之基恭謹薄言和平以學考視劉媛温
恭具儀膏沐以韜絲帛是師外防內完拮据孔艱孩無
矯慈諸御間間匪異其誠由衷久安興言遺思載汎載
瀾女史曰微德音莫踣瞻彼墓田有類斯泚松岡豐融
不震不圯廣揚嘉芬式裕爾嗣

盧母王夫人墓誌銘

盧氏河北望族有諱仙者家深州武強縣金將亡武強

為秦趙要衝歲蹂兵不息由是徙家睢州兵浸南家益蕩析有子曰全掠為奴于時全生子曰榮甫十歲審其父北行斷髮仰誓呼曰兒不獲見父寧即死行泣道中呼其父姓名道絲真定日號訴宛轉事益著里人憫之問所掠主無異辭卒義以歸父子復居武強稍長學書算入鄉校試吏為縣從事時錄事王君崇攝武強審盧氏子孝感且吏能廼曰吾女舍盧氏曷取配遂以歸生子四曰文曰仁叔曰廷信季曰德廷信生始三年不幸

盧君卒夫人撫其四子力治桑柘甘苦淡垣屋庠狹內
外整截有限程督訓導過者無敢譁事其舅姑以壽終
至元十三年詔考郡縣孝節於是河北道提刑按察司
審盧婦事不誣州達于禮部復除其家而廷信始仕江
南調泉州晉江尉辟福建行省掾又掾江西叙遷為鄞
縣丞復掾江浙未幾以才佐海道漕府陳不便事就領
金符為溫台千戶歲運粟視往歲數三倍而夫人皆見
之廷信為鄞丞余時里居見其處事精覈剔植蠹利官

長不能出私語上府陳白伉直無隱嘗曰吾盧氏世為
吏刻峭文致非以起宗吾父有孝行迄不得上壽稍自
飭勵繫吾母之訓戒子孫為儒冀吾母慰意焉至大二
年夫人卒年八十有六祔葬于先塋延祐二年天子孝
治天下推賚存歿而廷信秩五品得贈其考奉議大夫
真定路趙州知州驍騎衛尉栢鄉縣子夫人亦追封栢
鄉縣君四年遣其子某來京師請銘楨待罪史館若盧
氏事誠宜書今誌也無溢辭系以銘曰

林林生民男室女家禮失俗淪企而祿奢維貞丈人尚
古不遐卓彼孝童木升斯華承筐來嬪絕其榮夸四雛
在戶蓬首苦心甕牖屹城過者肅襟宅里表植柳槐森
森頰弁奮揚滑甘具新大塋莫嗟淑德岑嶽戒而孫子
服儒以嗣教經展世厥武踵起有隆墓田大賚告祉式
時芬苾永保千祀

侯母王夫人墓誌銘

世祖皇帝以仁立國敦節申義丕變醇厚至元八年時

則有若太保劉文貞公議事省中增益令式繇是郡縣
旌表綽楔槐柳光于往史猗歟休哉桐繇集賢歸里居
錄事判官侯玉踵門來言曰聞子嘗執筆太史節婦孝
子歲終必登于史籍玉也敢有言玉故居濮州郵城縣
其先女真人曾祖敬嘗為金殿前將軍祖林金人匠總
管父珪仕皇元為濮州儒學教授濮州不幸年四十有
一以卒母王氏生子女六人惇然未勝喪吾母之教四
子也皆身訓之其鞠二女也必教以慕組化治嫁娶耕

稼能謹之以時家貧無生產而充然若有餘者繫吾母之力也玉兄弟既長而吾母益能綜核靡密不知有缺怠故任者得盡心於官政而不仕者孝謹稱里閭玉之為婺州永康縣巡檢時至大三年也母年七十有七以卒至是寢居凡四十有餘年矣後復為婺之平準庫副使婺之人知吾母行若是縣儒士具實言於縣縣下於鄉加考察焉繇是以達于郡郡復移於所居州州明於禮部然後悉如詔旨旌于其鄉敢以是有請傳永遠鳴

呼劉向作列女傳當熙明之時則肅雍平和藹然有關
睢士女之行至於末季則不幸不得全其生讀其書未
嘗不興歎也孝慈耕桑帝堯表閭夫人生承平貧能以
禮防少老一節實聖天子休養生息漸仁秉德有自來
矣盛矣哉能勿書乎夫人名妙善父某妣某氏長子伯
巖勅授定海慈溪兩縣船官次某不仕幼即玉也女嫁
某氏銘曰

勵其躬訖于蓬慈儉勤壽考終表華楹帝堯功過者式

報媿豐

劉夫人墓誌銘

婦人之事舅姑有從其令者矣若近矣莫知其心焉有
屈體承色先事以備逆志以求其得謂之孝與或曰是
知及之考其中有疑焉今之為舅姑嚴重則生畏畏不
能以洽玩弛則生怠怠近於瀆閨門之訓厲以失之而
容忍者於教乎何有在易之象曰家人嗃嗃婦子嘻嘻
吾於郝君鹽使從之之夫人有取焉夫人姓劉氏河間

人父諱鼎母牛氏夫人之姑李嘗祝香以告曰願吾子
孫生悉如劉婦噫此非出於令與知也孝根於心怨咎
莫知旻天中野且悲且懼若婦人貞靜其誠懇顯著一
語以盡茲其為孝也大矣夫人事夫之寡叔母夫之孤
姪有恩愛鹽使病未疾歲久不愈斥竭簪珥佐醫藥教
子志善能植立兩見為監察御史至治二年某月某日
卒年七十有二明年二月某日祔葬于西山之祖墓楸
往銘鹽使君矣今御史復請銘夫人諛溢辭事史官所

大戒婦人事不出閫戶以孝養為飭躬本考其姑嫜之
言是宜書銘曰

有言閭閻有儀珊珊視其溫寒靡覲愠顏從姑玄宅弗
愧以懌繫爾後人以永作則

韓夫人墓誌銘

中原韓有二族居會稽者為安陽居廣信者為潁川龍
圖閣學士無咎公師表一世其子仲正克紹家學搢紳
號二韓父子而廣信別出一族曰侍郎公祥字履善常

卿公補字復善嘉熙中士類稱為二韓兄弟楠族祖正
肅公持節江東辟入幕府在後省復薦為國子官人皆
曰正肅善選士二韓公聞望駸駸與潁川相並盛矣哉
天運合一衣冠家漸滅幾盡江浙閩蜀大略相近余歸
老里閭有儒生踵門而告曰容徐氏子祖母韓夫人無
為大夫諱裡之女大夫二韓公之親弟也自夫人歸徐
門克持其家事姑以孝著待夫之弟妹助裝以有室家
其相夫也卻金以成美夫官建寧僚屬有不孝其母者

夫人引喻廣譬能使其妻訖事姑以禮訓子舉前史言行時刻畫故事人物以佐警戒故其子孫俱能守家教容又言曰徐故廣信大家刑部侍郎諱元杰實容從曾祖桶聞侍郎公侍講筵于時史丞相圖起復百僚皆進疏理宗猶豫不決侍郎獨微言曰邊事漸寧從戎以墨纒失國體丞相誠經濟老其才以用未晚也丞相聞是語憮然曰嵩之不得起復矣夫人之舅諱卿子朝奉郎權知嘉興府事其夫諱忠甫終廣德建平尉夫人之曾

祖大寧奉議郎知徽州婺源縣妣諸葛氏贈宜人祖貴
玉贈朝請大夫妣端明汪公遠之孫女男一拱辰將仕
郎信州路永豐縣主簿先八年卒女一順正適祝士貴
孫男五宜容宅安實孫女四卒以至治二年享年八十
以泰定二年某月某日葬于某山容不遠千里來謁銘
秀整足以興植使世家皆若是其曷有憂廼為銘曰
亭亭兩家允為舊門服習懿德克紹厥聞幼工女史粲
其簾紉亦游於藝靡不究勤母目既盲舐膜還明來嬪

于徐事姑益精奉跪擇甘順具性情不侈其長不夸其
盈訓子督孫雅言諄諄龐眉秀姿儼兮淳真宦族日圯
內教莫陳吁嗟夫人表茲堅珉

定水源禪師塔銘

大雄氏以已說剖三宗禪學汪洋廣博言意承接絕去
文字稍契入輒證為知道小智大黠相煽以自高律教
廢棄食不知耕居不知工恣情於無畔岸而道益以昧
唯妙源師獨憂之自嘉定十七年受具戒即游方明本

心久而曰不耐塵勞心曷以制願習賤事以調御寓本
州天寧寺歲大饑赤足踵門以化後始歷清職曰吾得
無媿名教矣其師愚公持正議不肯下宰相吳潛潛怒
繫獄辱之退居精舍獨侍側辨難卒有疑義愚公啟機
以示曰汝今太平矣愚公住徑山即俾首率僧衆愚已
老學子林立寮下析微統宗愚喜力贊之主平江薦嚴
內外事不一廢舉鼓山國清辭不就主泉州水陸院治
若薦嚴而俗士益信慕愀然曰吾寧久是攜錫以歸楸

先曾大父太師樞密越公功德院曰定水伯父賓州先
府君處州議曰寺缺主者善趨謁迎奉吾兄弟不受能
以寂照解脫為義則庶幾冥福源公行堅望高使力請
必不讓以素所往來者通意廼欣然以來桶時年十三
或問曰吾儒性善與佛所言同否曰同感物而動漢儒
失之由是有不同焉後廼曰儒釋二教分別有異在治
人治心治人在五常治心在四大修五常治人之本修
四大亂心之本道微世衰誠得一人焉不可得涕淚交

下謂桶曰祿損則福益盍慎諸布衣鐵衾終日尸坐語
徹機迅奔電絕壑不可制伏稍斂戢則瞬息在几席禪
人仰之四方士尤宗之精於詩故宋名士喜之然不肯
表襍舊築居於越之雲頂將終願解定水以歸且命無
建塔無火化以任其壞其徒不忍卒埋是山以至元十
八年卒壽七十有五俗居象山縣姓陳氏為僧五十有
九年銘曰

道弊於文卮言以宣繇簡遠超悟者日繁空浮變騰若

火燎天服竒食珍謂合自然師實已憂榮戚靡覩或逃
于谷或伏于莽唯大雄是遵唯古德是祖機以峻傳言
以戒輔通黜興廢道曷敢替幽扃潛珍戶屢屬係彼昧
其承卒黯以逝昭銘授徒勿圮勿翳

延慶入法師塔銘

四明法智大師以天台教旨經緯導達學者謂為中興
南湖寶謁貫舊址踵主具席稍不厭衆議嘗病交集歷
代承接皆有足稱道至師居南湖千口無異辭師名善

入傅姓世居定海大蓬因法師見異之淳祐十一年與
半山彬師俾受具戒游諸方辨解究詣客東掖山著教
家四書據會執約不以文字溺泥指畫勤懇從者樂其
易簡初佛光法師居上竺提其徒悉使出門下于時有
善良師與師相講習各植立不肯和附師與良議曰吾
師大蓬兄能嗣之願再拜以嗣良後嗣圓覺頑空師而
師卒能昌大蓬始典謁南湖後首教坐主赭山東臯世
宗其說以角立為大病支離為末流泛不溢詞約不厓

絕禪人士子咸傾仰之興仆復侵安衆靡懈泉南僧素
宗禪學慕師德重趼以請法智之學行於東南六十餘
州至是入海嶠人益竒之至大年中詔宣政行院慎採
選勿阿意貪倖集議者曰南湖缺席捨師孰能遂以昔
日所傳授者深省密啟空假破建一性明靜而互議交
毀訖忘于言大蓬果有聞於世崇本誓志師於是有成
焉具凡見於修植施於人事今不復著錫號惠觀弘教
法師而自號曰秋虛延祐闕年五月二十有六日示寂

為僧六十三身年七十有八化于城南頂骨得舍利葬
法智祖廷而以爪髮歸東臯家間之精舍至元間楠納
交于東臯叻若不能言聆其坐講則汪洋罔詰秉行潔
清癯容儼修粹然古德有足興起弟子大倫正道等來
乞銘廼為之銘曰

四明之興匪事於言素齋萬殊貫于心源如水必東如
矢必鵠末世濫觴語益以瀆佔畢究鋪千緒億條炎炎
蒼蒼泛焉以寡師慨有憂約陳其辭探微發機會歸一

岐承宗紹傳不希其逢謝彼翁訛矢心圖終後歸南湖
振揭初說曰吾師有傳茲道不滅弗蔓其根弗瑕其璞
癯然蕭閒廓以恬泊世教日淪躡雲徂高著爾懿德我
銘用昭

天童日禪師塔銘

紹定辛卯蜀破士大夫蔽江東下成都大慈寺主華嚴
教僧之秀朗率棄舊業以教外傳游東南若癡絕冲無
準範導達後進表表名世者皆其門人而範之成就益

衆天童師其一也師諱淨日號東巖俗居南康之都昌
姓廖氏幼歲喜誦佛書解大義常食蔬果以自持年十
五告父母願為浮屠氏明年祝髮于廬山香林訪道仰
山石霜遂入浙見冲師於靈隱越二夏不契乃登徑山
見無準師範大許之語在傳道錄後見西巖惠于天童
惠無準師大弟子其提示與無準無異危機敏鋒迎拒
莫覩風止水息渙然帖順遂密契其旨卒服從之俾守
巖室後開先無文璨屈為第一璨亦僧之後傑繇是譽

聞益彰宋景定某年江東帥汪公立信慎許可推以主
圓通咸淳某年江東漕使錢真孫俾黃領東林至元壬
辰主育王三年歸隱雪竇大德四年集公議主天童師
之行峻絮以完語溫氣和衆益得以親納其徒俾明徹
復性不侈于言解其蔓感處於世若無所施為遐邇嚮
慕傑閣銅象無踵以至而於天童功最著久居東林化
俗警衆民爭繪以祝故其興天童廬山之民奉貲以助
尤夥生宋嘉定十四年辛巳終至大元年戊申年八十有

八僧臘七十有一將示寂戒其徒書韻語以示曰天為
蓋兮地為函吾奚為乎塔與庵灰吾骨兮山阿言已矣
兮勿鏡越二日沐浴端坐而逝其徒奉遺言以化齒根
不壞遂斂藏于西巖之清風塢噫者舊日淪爭慙恣蕩
甚於世人理不勝欲靡然頽瀾莫有障窒觀師景行實
泚其顙今弟子在浙東西江東西若干人蠻溪嶺嶠承
師之教亦不可勝紀如砥等來請銘銘曰

七情盪摩約性返源喻以攝持匪夸浮繁末俗盪觴競

立險艱眩一駭百莫執其凡性本湛虛分別則二不以
解通不以思擬寂非有存感迺隨義達摩之功空其所
空奚後人騁馳庸失玄宗空不假為茲惟用中蜀學簡
易師承其風開盲振瘖發機以示云彼摩尼非淨非穢
往安自然是謂止止鮎背長身從者如水丹霞嵌空匪
耀凡目曰茲山之顏否極斯復敬者效輸罔不率服山
君來朝雲釀霧轟幻身既空勿錘勿斲一氣孔周窮彼
變易清風之塢石列五色恍焉如存嗣者是式

廣恩仁法師塔銘

師名可仁貫天台縣寧海姓胡氏號木庵幼歲游四明
山居資福寺習天台鈔疏于時我曾大父樞密越公治
齊國揚夫人喪見師秀整儼恪俾以從服闋吾必以汝
祝髮資揚夫人福越公以右司郎中歸召為軍器少監
尹臨安樞密之夫人周國陳氏曰師宜祝髮矣嘉定十
三年設齋上竺迺得度于時月大師以講論訓諸徒願
侍席側大師與越公厚善謂師曰今僧徒聰敏林立稍

使一人預人間事得無害統體乎繇是在郡治間歸胡
魯展治林嶂一以任師在館中叅政應公繇猶未仕深
器之曰使師不為僧其問學當與士子並中書舍人陳
公耆卿時為臨安教授與師同里亦曰應公言然越公
入政府例得經院迺相攸紫巖繩約四履峻危有階引
泉有梯淬醢除險帖石助高審面曲直周析獻秀紹定
肇工淳祐告成屈以主席錫名曰廣恩崇福伯祖吉州
大父尚書咸諉以事固有弛缺往侍諸父時見師承接

曲盡而恃氣凌鑠者不敢出慢語至於楠四世矣噫逮
今五傳有不善扶植者矣而師亦四傳守規蹈矩僅一
二數兩家相視皮乎可懼楠繇翰苑歸登塔亭謂塔主
子鎮曰往事將湮沒師之行業不可不紀其徒曰是在
太史師以至元十七年某月某日入寂僧臘六十一度
弟子二十有闕人有詩集若干卷大澤大雅相繼主是
寺凡四十年規約散弛今有子堂子鑑子鎮子金子真
猶能知師遺事下是不復解其寧有不良也夫銘曰

維大雄氏內寂外修不偏一能用彰以周在師敏通卒
異其儔峩峩新宮百礎承宇以其彌縫莫或敢侮智周
行圓者年以輔成之匪艱承之孔難大訓厥徒黜愆矻
頑昭銘以儆勿踰其閑

延慶良法師塔銘

天台之學其說汪洋浩博旁訓廣詁多至萬言學者讀
其書前迷後遺究厥本旨更席不能以終良法師始疑
之謂絲律以入則心以懾持絲禪以入則心以解脫玄

文妙旨約以據要事理昭晰如瘖獲吐如盲獲覩其為
書曰十門指要約說三卷指要餘論一卷教觀宏立門
分戶列貫穿出入莫窮其塗師以諸部證其義例條焉
不紊示焉指掌其為書曰教觀撮要四卷三千別說則
其師覺法師之言具在舉世尚同因省立異良非苟於
言也師名善良字子直號月溪族姓朱氏定海縣人始
祝髮淨居習律湖心游杭之大雄師頑空覺大師空問
不二門所屬三諦三千其旨意與空合覺大師言辯簡

峻師入其室嘗俾守講席後游淨慈訪禮禪師以古德語叩辯禪語瞬息眩晃意師泥名相為可惑師徐曰三觀之旨不外乎是禮謝曰其歸振汝宗集慶寺成朝命選主席班從者亦皆精良晦法師主上竺任可否師預是選講大涅槃經聽者雲集師懸辯提機整暢理得然卒師頑空上竺不能強也主禪惠擇陽報國藥師治平戶屢日接別為堂以處篝燈星列咸曰是宜繼四明矣歲既久卒以輿論主延慶至元二十六年寺延燉茆舍

草緝諱論彌不輟大德元年九月某日入寂僧臘六十
年七十有九奉遺骨歸于祖闕楠居邇南湖幼歲游起
信堂羣僧誦聲接几席取其書讀之茫不能解泰寓曹
先生說曰取子直約說讀之斯解矣後來南湖覩其容
和以莊其說坦以明始悟曰先生語不虛矣歿三十有
一年弟子久恭來請曰公深知吾師吾教有行業碑敢
以請迺不得辭銘曰

天台之宗明性合理銖縷其別弊極口耳以言顯道言

曷有止若舟在川茫不有涖若蓬繫風去莫以趾支離
演文積沓鱗楮迷途具茨珠探濁水至簡以求允究厥
旨聚不滿握邇納步跬解其桎梏一貫真詣南湖之度
屢履纒纒振塵一言聞者竦起遺書具存毋敢訾毀昭
哉是銘千祀勿地

空山雷道士墓誌銘

孔子曰文勝質則史班固亦曰道家者流出於史官豈
其然乎老子為周歲室史酌古今治亂成五千言致用

以準易較其治良不誣也噫為老氏者其知此與河圖
洛書聖人則之易書誠經緯也微言既湮傳注門戶各
立自勝易與書迄不能並士方斷斷然不可參錯進老
子之說焉得力而勝諸士患無恒心遇不遇命耳曠百
世而相感者吾得一人焉曰雷齊賢始予讀其書益知
其所以言病乎世莫知其涯也齊賢所為書援據切至
感厲奮發不蹈世俗繩墨合神以窮變盡變以翼道申
言廣指其於力誠至矣今知齊賢者不若是則齊賢之

意將終無以自表齊賢於書無所不讀思資以為是書者其道然也道散於九流百家同歸而殊塗唯老子最近然則易老誠相表裏耶嗚呼齊賢之志予深知之矣齊賢著書曰易圖筮通變義老子本義莊子旨義所為詩文二十卷和陶詩三卷齊賢名思齊家世臨川人幼棄家居烏石觀晚講授廣信山中暨終也復歸烏石治其寔而先表焉表曰空山雷道士之墓卒時年七十有二番陽吳成季廣信弟子也嘗曰空山先生承絕學於

蕩裂縑刻志意却甘茹苦光景變幻皆隱匿不道飛伏
控握愈眩愈遠道無有矣今遺書具在匪吾徒私彰確
者如是則行若藝猶其粗也陳郡袁桶以是銘銘曰
入而不出神不可以物通而不寒用不能以沐膏軸御
輪其行彌跋無適不宜曷問其津生以道為樞死以天
為徒有隆空山泉流舒舒矯爾後人抑華食實弗續弗
雕我銘是質

戴道士墓誌銘

予讀桃源記私竊以為慕肥遯有遺於世者之說云耳
後讀地志則沅南地今號為桃源者不與王化邇安食
水土無君臣守令之程節於徵需乎何有嗣後地益闢
桃源遂為壯縣溪峒增為十州今烏能辨桃源也哉或
曰州有桃源宮累聖蠲復山水清湛其人醇厚直且信
使能居之寧非桃源乎戴君道安和甫其人歟和甫成
童辭家為道士性疏曠無畦町其師王君文卿器之俾
遠游見開府大宗師于崇真宮隨其委令風雪承給不

少替請於人也事弗就弗止而人不以煩避之處於衆也率退以自持衆先矣而君亦跋焉以及之故亦受制為龍瑞宮提點奉香于武當桃源性不喜臧否遇酒嗒然以忘然不復失事故職教者彌任器世人以記短長逐日影為能事君不能且鄙耻較其得失是真無懷尊盧之民矣豈唯桃源民哉往歸其宮攜酒邀父老游白馬洞天洞近長磧山酒酣援筆述韻語曰吾死必藏是延祐七年還京師明年改元至治正月某日微疾以逝

年若干斤其囊資不能以歛遺言以弟子李禮謙領宮
事和甫在崇真度弟子天台徐信初厚禮翰林待制虞
君伯生俾教之伯生與予皆故家見後進傲誕不復與
語獨信初給事無情聞論文獻道德嘗惕悚不自置信
初果能為請銘君斯無憾矣某月某日葬是山銘曰
棄方利觚睨盱以趨何誕之日多樸莫能扶瞻彼沅溪
中季載圖具德弗雕其人允符持觴養和奚憾之祛命
也不尤卒為天徒

通真觀徐君墓誌銘

開府玄教大宗師張公留孫以玄道贊理陟降帝庭踰
四十年其承次授受同流一源罔有支別故其弟子相
傳多至六七十人以文辭議論達國體者為之嗣教其
餘彬彬行能清整英發林立輩出或激昂自修則俾之
挈綱振維往來京師山林間重其名教若是者寧不備
矣夫開府弟子之最長者曰徐君余官翰林十有六年
未始識之延祐四年開府年七十始來上壽閉戶不復

出戶限邂逅于庭中若相避然者集賢大學士李公杲
傳詔醮崇真宮益避跡隱奧中集賢語開府曰聞高弟
在是願接顏色可乎強之見揖以退復辭其師曰弟子
歸山中不來矣願師自重至治元年專价走京師作訣
別語衆咸疑焉未幾訃至灤陽以夏五月癸巳化于仙
源宮得年八十有二於是嗣師真人吳全節率其弟子
為位以哭皆不勝其哀且以狀求余銘維徐故士族祖
某父某君名懋昭字德明饒餘干州人饒為衣冠望郡

宋端明湯文清公丞相江文忠公善衡鑒幼獲接識之
繇是棄仕譜為老氏學以其道游江淮間于時烽燧連
警百里土舍不相接獨澗飲草茹以善勸勵俾崇信其
法後皆化之開府公入皇朝隨侍二歲即歸且誓曰釋
老以募衆集施為能事叩門嚙齧抑獻笑且取誚吾不
能若是當益貶損焉積數十年作仙源觀久之復作神
翁觀佳木奇卉編緝壑治山林壠畝陂塘之利益充然
衍裕卒能遂其初言歲饑以餘食餓者不足則捐直以

售葛衣布疋十數年始一易見者服之老氏之學力本
自治退足無欲其言黯以彰不知者以虛無釋之邈不
相涉矣夫不巧於外則必慎於內宮室蔬穀絲麻丹漆
之物燕興俯仰之節酬酢進退之儀人之生不能以缺
也今而曰吾無求焉將何以取具世以役鬼神竊服食
為道吾不能知之不惑於衆則害於民者寡考其自治
則於吾道合清淨富強昔之時君嘗師之則凡刻繕者
誠得矣夫何疑焉余嘗侍開府公言語絕臧否者而謹

默而簡退與副師游彌綸損益將以行其道是非家庭之教績業纂素能若是乎盛矣哉大德六年制授主常州路通真觀皇慶元年制加保和通妙崇正真人二觀亦以璽書尉鎮焉以是年某月日葬某山開府再傳曰李立本陳義高義高明朗通豁器行瓌特贈粹文冲正明教真人皆蚤世今以次傳者曰余以誠何思榮吳全節孫益謙李奕芳毛頴達夏文泳薛廷鳳陳日新餘若干人將葬開府惻然曰吾弟子蚤從吾游其亡也不宜

以薄迺命奕芳歸蒞葬銘曰

林林生民厥初一原帝霸肇分兵刑日嚴維玄元君治
道不繁節約寡求罔有僭貪榮觀超居導迎泰和絕色
屏味日用不頗後侈怪竒風揮電訶造舟構臺百靈迄
訖赫赫大帝尊企清淨玄風恬寂守貞自正溫溫開府
不夸不佞于帝左右淵默無競在師承之儉以繩之泯
泯自營卒克興之道合古初訖莫我病銘昭真寔是式
是證

陸道士墓誌銘

道家者流以清靜無名為本時王以其宜於治國靡然宗之傳世益薄長生之說侈卒茫昧不復講今世所傳惟法藥與術藥術又鄙棄不用而法僅傳謂其宜於水旱疾病通得而用之也余行天下與方外士游率不得一二蓋其傳受訛缺浮靡恣蕩攝思握神罔不知所以而其祛役禁制按圖以求以咬瞬息欲通靈於肘蟹不可得也噫其教若是而為其學者又皆不自植立可哀

也矣余居近東嶽行祠有陸氏者掌其祠有年矣其四世孫曰頤真幼歲識之儀觀秀整淵乎抱道之器與之語慎重不伐悒悒然欲求其師未能也日尊所聞抄綴盈篋樓楚公諸孫坦好黃老能以參考損益編簡往受其說遂為弟子後聞天台桐栢山有靈寶法福聖觀道士曹君為正傳往師之又聞維揚潘師得白真人上章法遠遊以受然不自表裸處羣衆益簡嘿丹經筮書星歷孤虛之術悉究詣旨要晚得末疾疾漸革呼其弟子

陸宗玄張蒙生語授受本末且曰我死必得表內翰誌
文以信後是死為不朽當葬我於先母之墓側墓在翔
鳳鄉白石紫虛觀右紫虛樓君所建實繼其事曾大父
軾大父景文考斗瑞生宋開慶元年歿時年六十有七
實泰定二年七月某日也葬以某月某日其弟貴和實
來請銘哀其志嘉其勤而卒不逢非命也與銘曰

握竒制氣超鴻濛約束萬神驅霆風物無疵癘玄感功
秘圖靈籙昭羣蒙後生棄暴甘盲聾嗟哉紫虛憂忡忡

踰江越嶺真一逢死生晝夜在反終不怛其化輪旋空
恍兮步虛出雲中有縞之鶴來城東

清容居士集卷三十一